

# Plattdüütsch-Zentrum fiert tein Johr Platt för de Lütten

„Snack Platt mit mi“ för Multiplikatoren ut Kinnergoorns un Scholen geiht ok in de Corona-Tied

**LECK** En Schild vun de Nordsee-Akademie wiest de Weg. „Platt för de Lütten“ is hüüt in't Huus Südtondern. Överal stahn Schillers: Abstand holen, Masken opsetten. Bi Hosten un Niesen en Taschendoock oder de Ellbogen bruken. Hanne afspöhlen mit Desinfektschoon. Op de Deel sünd Wege afklevt – allens geiht över Eenbohnstraten. Sogor na Tante Meier geiht dat blots mit Abstand.

An de Döör vun de Seminarruum kann een sik anmelden för't Middageten. Dor liggen Masken, wenn een dat vergeten hett. Jeedeem mutt Naam, Adress un Telefon opschrieven. All Plätze hebben Nummern un sünd tominnst annerthalv Meter uteneen.

Achtein Lüüd sünd kamen hüüt ut Pinnbarg, Kiel un ut Flensburg, Sleswig un Nordfriesland. All wüllt mehr över Plattdüütsch weten. In Kin-



Fröhliche Oogen achter Plattdüütsch-Masken.

FOTOS (2): GESA RETZLAFF

nergoorns, an Scholen sünd se aktiv – beruflich un as Ehrenamtlers. Leespaten sünd dorbi un Poppenspelers. Vele könnt Plattdüütsch un anern versöken sik.

Vörn steiht Dr. Hartmut Arbatzat. Um sien Kopp en Plastik-Sprütt-Schutz un en

Mikrofon um de Hals. „Kurs 2, Basiswoortschatz“ is hüüt an de Reeg. Drögen Kraam?

Gau sünd se all mit dorbi. Wat kann ik doon gegen en Müllewapp in de Hoff? „En ganze Dag mit en Treckerhen un her fohren“ is denn en harmlose Raat. All weten se

wat ut egen Erfahrung.

Worto bruukt man en Induktionsheerd? Geiht en Kookinsel ok in en ganz lütte Köök? Is en Fernseher noch in oder geiht de Trend hen na en Beamer? Bi en beheizte Woterbett geiht de Phantasie denn richtig vöran. Kann een

seekrank warrn, is so'n Bett nich to swoor? Wo kummt dat Woter her, wo löppt dat hen? Liggt een op den Barg un de anner denn in't Wellental?

Hartmut Arbatzat maakt Woortschatzarbeit so einfach un so spannend. Nu is al Middag un de Kurslüüd hebben all mitmaakt un vun langwielige Woortschatz un Grammatik gor nix markt. „Schaad, singen könnt wi hüüt nich. Dat geiht bi Corona blots buten un dat is hüüt to koolt.“

Siet tein Johr gifft dat nu ‚Platt för de Lütten‘. De söss Kurse heten Spraken-schicht, Basiswoortschatz, Basisgrammatik, Texten un Leesböker, Didaktik un Methodik un darto Medien för de Praxis. Jümmers an en Sünnavend vun Klock tein bet Klock veer. Fördert warrt de Kurs vun dat Kieler Ministerium för Soziales un meist is de Kurs een Johr vörher besett.

Över 200 Multiplikatoren hebbt de Kurse besöcht un geven an Kinnergoorns, Scholen un anner Steden de plattdüütsche Spraak wieder. Kiek na ünner [www.plattdeutsches-zentrum.de](http://www.plattdeutsches-zentrum.de). Dit Johr hett de Zentrumsleiterin Gesa Retzlaff för all Kurslüüd extra Schutzmasken maken laten mit dat Logo „Snack Platt mit mi“. De Plattdüütschen laten sik nich ünnerkriegen.

Ingwer Oldsen



Plattdüütsch geiht blots mit Abstand un mit Masken.